

Newspaper	BERITA HARIAN
Date	5 AUGUST 2016

# Permohonan batal saman Tun M didengar 7 November

BH - 5/8/2016

→ Dr M, 2 lagi diarah kemuka afidavit jawapan terhadap permintaan dikemuka Najib

Oleh Ahmad Johari  
Mohd Ali  
ajohari@bh.com.my

↳ Kuala Lumpur

**M**ahkamah Tinggi semalam memerintahkan Tun Dr Mahathir Mohamad dan dua lagi mengemukakan afidavit jawapan terhadap permohonan Datuk Seri Najib Razak untuk membatalkan saman mereka, se-

belum atau pada 5 September depan.

Peguam Datuk Mohd Hafarizam Harun yang mewakili Najib berkata, Perdana Menteri pula dikehendaki memfailkan afidavit balasan pada 19 September depan.

### Dakwaan salah laku

Saman itu difailkan Mahathir, bekas Naib Ketua UMNO Bahagian Batu Kawan, Datuk Seri Khairuddin Abu Hassan dan bekas ahli UMNO Langkawi, Anina Saadudin dengan mendakwa Najib melakukan perbuatan salah laku dalam jawatan awam berhubung siasatan kes 1Malaysia Development Berhad (1MDB) dan dana RM2.6 bilion.

Mohd Hafarizam berkata, Hakim Mahkamah Tinggi Abu Bakar Jais menetapkan pada 7 November ini untuk mendengar permohonan Najib membatalkan saman itu, dalam kamar beliau.

Yang turut hadir dalam prosiding itu, peguam Muhammad Rafique Rashid Ali yang



Mohd Hafarizam Harun

mewakili DrMahathir, Khairuddin dan Anina.

### Tak rayu keputusan Mahkamah Tinggi

Sementara itu, Muhammad Rafique ketika ditemui berkata, pihaknya tidak akan merayu keputusan Mahkamah Tinggi menolak permohonan mereka untuk memanggil dan menyoal balas Najib berhubung afidavit sokongan Perdana Menteri bagi membatalkan saman dikemukakan terhadapnya.

Dalam saman yang difailkan pada 23 Mac lalu, ketiga-tiga plaintif mendakwa Najib sengaja mengganggu siasatan berhubung 1MDB dan syarikat berkaitan, serta siasatan aliran masuk wang RM2.6 bilion dan RM42 juta daripada SRC International ke dalam akaun peribadinya.

Plaintif mendakwa Najib menggunakan kedudukannya sebagai Perdana Menteri, Pengerusi Barisan Nasional (BN) dan Presiden UMNO bagi melakukan salah laku itu.